



გ ა ნ ჩ ი ნ ე ბ ა
საქართველოს სახელით

04 მაისი, 2011 წ.

ქ. თბილისი

თბილისის სააპელაციო სასამართლო
ადმინისტრაციულ საქმეთა პალატა

მოსამართლე – ნანა ჭიჭილეიშვილი

აპელანტები – საქართველოს ფინანსთა სამინისტროს მსხვილ გადამხდელთა ინსპექცია და თბილისის საგადასახადო ინსპექცია

მოწინააღმდეგე მხარე – შპს „მეტეხი-95“

მესამე პირები – საქართველოს ფინანსთა სამინისტრო, საქართველოს ფინანსთა სამინისტროს საბაჟო დეპარტამენტი, საქართველოს ფინანსთა სამინისტროს საგადასახადო დეპარტამენტი

დავის საგანი – თანხის მომავალ გადასახადებში აღდგენა;

გასაჩივრებული გადაწყვეტილება – ვაკე-საბურთალოს რაიონული სასამართლოს 2002 წლის 14 მაისის გადაწყვეტილება

აპელანტების მოთხოვნა: გასაჩივრებული გადაწყვეტილების გაუქმება და ახალი გადაწყვეტილების მიღებით სასარჩელო მოთხოვნის დაკმაყოფილებაზე უარის თქმა

ზეპირი მოსმენის გარეშე განიხილა მოწინააღმდეგე მხარე – შპს „მეტეხი-95“-ის საჯარო შეტყობინების შესახებ საკითხი და

გ ა მ ო ა რ კ ვ ი ა:

ვაკე-საბურთალოს რაიონული სასამართლოს 2002 წლის 14 მაისის გადაწყვეტილებით დაკმაყოფილდა შპს „მეტეხი-95“-ის სარჩელის მოთხოვნა: შპს „მეტეხი-95“-ის პირად ბარათზე ქ. თბილისის ვაკე-საბურთალოს საოლქო საგადასახადო ინსპექციაში აღდგენილი იქნეს მომავალ გადასახადებში 78148.43 ლარი; მოპასუხე საქართველოს მსხვილ გადამხდელთა ინსპექციას დაეკისრა მოსარჩელე შპს „მეტეხი-95“-ის სასარგებლოდ ეროვნული ბანკის მიერ დადგენილი წლიურად 12% სადაო თანხიდან – 78148.43 ლარიდან 1999-2000 წლებისათვის, რაც შეადგენს 18755.62 ლარს.

აღნიშნული გადაწყვეტილება სააპელაციო წესით გაასაჩივრდა საქართველოს ფინანსთა სამინისტროს საგადასახადო დეპარტამენტის მსხვილ გადამხდელთა ინსპექციისა და საქართველოს ფინანსთა სამინისტროს საგადასახადო დეპარტამენტის თბილისის ვაკე-საბურთალოს საოლქო საგადასახადო ინსპექციის მიერ და მოითხოვეს ვაკე-საბურთალოს რაიონული სასამართლოს 2002 წლის 14 მაისის გადაწყვეტილების გაუქმება და ახალი გადაწყვეტილებით სასარჩელო მოთხოვნის დაკმაყოფილებაზე უარის თქმა.

სააპელაციო სასამართლომ იმსჯელა საქმის სრულყოფილად, კანონმდებლობით დადგენილ უმოკლეს ვადაში განხილვისა და გაჭიანურების თავიდან აცილების გარემოებებზე, გაითვალისწინა საქართველოს სამოქალაქო საპროცესო კოდექსის 78-ე მუხლით განსაზღვრული დებულებები და მიიჩნევს, რომ ვინაიდან მხარის

ადგილსამყოფელი უცნობია და მისთვის სასამართლო უწყების ჩაბარება სხვაგვარად ვერ ხერხდება, მიზანშეწონილია შპს „მეტეხი-95“-ის საქმის განხილვის დრო და ადგილი ეცნობოს საჯარო შეტყობინების გზით.

საქართველოს ადმინისტრაციული საპროცესო კოდექსის პირველი მუხლის მე-2 ნაწილის თანახმად, თუ ამ კოდექსით სხვა რამ არ არის დადგენილი ადმინისტრაციულ სამართალწარმოებაში გამოიყენება სამოქალაქო საპროცესო კოდექსის დებულებანი.

საქართველოს სამოქალაქო საპროცესო კოდექსის 78-ე მუხლის პირველი ნაწილის თანახმად, თუ მხარის ადგილსამყოფელი უცნობია ან მისთვის სასამართლო უწყების ჩაბარება სხვაგვარად ვერ ხერხდება, სასამართლო უფლებამოსილია გამოიტანოს განჩინება სასამართლო შეტყობინების საჯაროდ გავრცელების შესახებ. სასამართლო შეტყობინება საჯაროდ ვრცელდება შესაბამისი სასამართლოს შენობაში თვალსაჩინო ადგილზე ან ვებგვერდზე განთავსებით ან დაინტერესებული მხარის მოთხოვნის შემთხვევაში – მისივე ხარჯებით იმ გაზეთში, რომელიც მასობრივად გავრცელებული მხარის საცხოვრებელი ადგილის შესაბამის ადმინისტრაციულ-ტერიტორიულ ერთეულში, ან ინფორმაციის სხვა საშუალებებში გამოქვეყნებით.

ზემოაღნიშნულიდან გამომდინარე, სააპელაციო სასამართლომ გაითვალისწინა რა საქართველოს სამოქალაქო საპროცესო კოდექსის 78-ე მუხლით განსაზღვრული დებულებები, მიიჩნია, რომ ვინაიდან მოწინააღმდეგე მხარის - შპს „მეტეხი-95“-ის ადგილსამყოფელი უცნობია და მათთვის სასამართლო უწყებების ჩაბარება სხვაგვარად ვერ ხერხდება, მიზანშეწონილია – შპს „მეტეხი-95“-ს სხდომის თარიღისა და ადგილის შესახებ - თბილისის სააპელაციო სასამართლოს ადმინისტრაციულ საქმეთა პალატა, 2011 წლის 18 მაისი, 16.00 საათი, სხდომის დარბაზი №1, ეცნობოს საჯარო შეტყობინების გზით. ამასთან, სასამართლო შეტყობინება საჯაროდ გავრცელდეს თბილისის სააპელაციო სასამართლოს ვებ-გვერდზე განჩინების გამოქვეყნების გზით.

სააპელაციო სასამართლომ იხელმძღვანელა საქართველოს ადმინისტრაციული საპროცესო კოდექსის პირველი მუხლის მე-2 ნაწილით, საქართველოს სამოქალაქო საპროცესო კოდექსის 70-ე-78-ე, 285-ე მუხლებით და

დ ა ა დ გ ი ნ ა :

1. ადმინისტრაციულ საქმეზე №3/ბ-265-06, აპელანტები – საქართველოს ფინანსთა სამინისტროს მსხვილგადამხდელთა ინსპექცია და თბილისის საგადასახადო ინსპექცია, მოწინააღმდეგე მხარე – შპს „მეტეხი-95“, მესამე პირები – საქართველოს ფინანსთა სამინისტრო, საქართველოს ფინანსთა სამინისტროს საბაჟო დეპარტამენტი, საქართველოს ფინანსთა სამინისტროს საგადასახადო დეპარტამენტი, დავის საგანი – თანხის მომავალ გადასახადებში აღდგენა, მოწინააღმდეგე მხარის – შპს „მეტეხი-95“-ის სასამართლო სხდომაზე მოწვევა განხორციელდეს საჯარო შეტყობინების გზით. სასამართლო შეტყობინება საჯაროდ გავრცელდეს თბილისის სააპელაციო სასამართლოს ვებ-გვერდზე განჩინების გამოქვეყნების საშუალებით.

2. სხდომა დანიშნულია თბილისის სააპელაციო სასამართლოში (მდებარე: ქ. თბილისი, გრიგოლ რობაქიძის 7ა) 2011 წლის 18 მაისი, 16.00 საათზე, სხდომის დარბაზი №1.

3. სასამართლო უწყება მხარისათვის ჩაბარებულად ითვლება სასამართლო შეტყობინების თბილისის სააპელაციო სასამართლოს ვებ-გვერდზე განჩინების გამოქვეყნებიდან მე-7 დღეს.

4. შპს „მეტეხი-95“ გაფრთხილებულ იქნას, რომ სასამართლო (მოსამართლე) უფლებამოსილია, მხარის არასაპატიო მიზეზით გამოუცხადებლობის შემთხვევაში მის დაუსწრებლად გამოიტანოს გადაწყვეტილება საქმეში არსებული მასალების საფუძველზე და საქართველოს ადმინისტრაციული საპროცესო კოდექსის მე-4 და მე-19 მუხლების დებულებათა გათვალისწინებით.

5. განჩინებაზე კერძო საჩივარი არ დაიშვება.

მოსამართლე

ნანა ჭიჭილეიშვილი